

## GRISCHUN

## Dapli dischoccupads la fin d'october

L'october 2021 ha il chantun Grischun nudà 1362 persunas dischoccupadas. Quai correspunda ad ina quota da dischoccupaziun dad 1,2%. Cumpareglia cun il mais avant è quest dumber s'augmentà. Il settember eran 993 persunas dischoccupadas. L'augment è dentant d'attribuir a la stagiun ed a la fin da la stagiun da stad ed atun en il turissem. Quai scriva l'Uffizi per industria, mastergn e lavur. Cun quai è il dumber circa sin il medem stan sco il 2019, avant la pandemia.

Da las persunas dischoccupadas en 657 dunnas e 705 umens. Il pli aut dumber da persunas hai dà en la branscha da gastronomia (559), tar la sanadad publica ed il socialesser (94), en il commerzi en detagl (85), tar il traffic e transport (80) sco er en la branscha da construcziun (76).

En Svizra è il dumber da dischoccupadas e dischoccupads i enavos da 120294 sin 116733. La quota da dischoccupaziun svizra è tar 2,5%.

## Lavor curta

Durant il mais october han 316 interpresas fatg lavur curta. Cumpareglia cun il mais avant cun 418 interpresas è il dumber sa sbassà. Las interpresas han temp trais mais da far diever da lur pretensiun per lavur curta. (rtr/fmr)

## CORONAVIRUS

## Coronavirus sa derasa – Tuttina bleras infecziuns sco avant in onn

En pliras regiuns grischunas crescha il dumber dad infecziuns novas a moda sumeglianta sco avant in onn. Actualmain sa chattian circa tuttina bleras persunas en izolaziun sco durant la segunda unda d'avant in onn. Lura n'haja però anc dà nagins rests en scolars e manaschis e nagina vaccinaziun. Quai scriva l'Uffizi da sanadad dal Grischun en ina comunicaziun. Suentar las regiuns Partenz e Landquart sa derasa l'unda da corona actuala cunzunt en las regiuns Plaun, Plessur, Viamala, Alvra ed Engiadina Bassa cun la Val Müstair.

Actualmain sa chattan en il Grischun 686 persunas en izolaziun e 1009 en quarantina. Glindesdi ha il Grischun annunzià 44 infecziuns novas aifer in di. 19 persunas sa chattan en ospitals grischuns e 5 da quellas en sin la staziun intensiva. Tenor il chantun exista il privel ch'il provediment medicinal sin las staziuns intensivass arriva a ses cunfins, sch'il dumber resta uschè aut durant las proximass emnas e chaschuna in augment dals cas grevs da COVID-19.

## Cussegliaziuns tar medis èn gratuitas

L'emna naziunala da vaccinaziun ha cumenzà ier er en il Grischun. Medias e medis da chasa, centers da vaccinaziun, apotecas, ospitals e vischnancas mettan a disposiziun en fin il 14 da november 2021 ina purschida da cussegliaziun e da vaccinaziun extendida. Las cussegliaziuns da vaccinaziun tar las medias ed ils medis da chasa èn gratuitas durant l'entir mais november. Ultra da quai èsi pussaivel da sa laschar cussegliar davart la vaccinaziun per telefon sur differentas hotlines. (cdm/rtr/fmr)

## LA CIFRA DAL DI

# 9,1

## hectaras

mesira il guaud selvadi Scatlé en la Val Frisal da Breil. Dapi passa tschient onns, dapi il 1907, stat quel guaud da pign sut protecziun. Però gia dapi tschientaners na vegnan runcadas naginas plantas pli en quel guaud. Dal rest: 9,1 hectaras correspundan circa a 13 plazzas da ballape. (fmr/dat)



Daniel Camenisch: «La comunicaziun sto esser proactiva, era sche l'infurmaziun è negativa.»

FOTO SOMEDIA

## Il comunicatur da Schons

Daniel Camenisch è enconuschent en l'entir Grischun dapi l'entschatta dal coronavirus la primavaira 2020. Daniel Camenisch è il comunicatur dal coronavirus grischun. Daniel Camenisch dirigia la comunicaziun dal coronavirus grischun tranter ils tschintg cussegliers guvernativs e 34 uffizis chantunals. El survegn fin 200 dumondas da medias per di. La FMR ha vulù intervegnir dapli da la persuna e da la lavur da Daniel Camenisch.

Cumenzà ha la carriera professionala da *Daniel Camenisch* cun in emprendissadi da mecanist d'autos. Suentar ha el frequentà ina scola da turissem e pli tard ha el absolvì pliras scolaziuns sco spezialist da comunicaziun e marketing. Daniel Camenisch è societari e gestiunari da l'interpresa da marketing e comunicaziun Vinavant SA cun sedia a Favugn. Durant noss discurs ha Daniel Camenisch ditg ch'el saja fitg attaschà a sia patria, la Muntogna da Schons.

**FMR: Jau sent dal discurs che Vos laschais enrescher per la Val Schons?**

**Daniel Camenisch:** Jau sun da Schons e jau charez mes vitg da Maton, nua che jau sun creschi si ed hai passentà mia giuventetgna. Là hai jau mia famiglia, mes amis e collegas. La savur dal vitg sin las vias da Maton, quai è patria per mai. Qua ma sent jau bain. Malgrà che jau abitesch oz a Favugn sun jau bler e gugent a chasa. Ed jau ma regord fitg gugent dals temps che jau hai prendì part activamain da pliras uniuns da la Muntogna da Schons. En il club da skis, en il chor maschadà, en l'uniun da giuventetgna. Quai ha dà contacts ch'èn fermes lioms fin oz.

**«La savur dal vitg e da las vias da Maton, quai è patria per mai»**

Daniel Camenisch, spezialist da comunicaziun e pledader dal coronavirus grischun

Da natira ennà saja el in tip fitg avert e legher, ha Daniel Camenisch ditg. En la comunicaziun professionala dovri dentant ina buna chapientscha da l'atgna rolla. Gist en la comunicaziun da crisa sco tar il coronavirus sun jau la persuna che lavura davos las culissas. Là tutga la tribuna al stab da crisa ubain sa chapescha a la regenza. Avant dus onns ha Daniel Camenisch fundà sia atgna fatschentà da

comunicaziun cun il num «Vinavant». Il num vinavant haja da far cun sia lingua materna e respleschia sia tenuta da guardar enavant, da lavurar a moda e maniera proactiva e da accentuar las conclusiuns positivass.

**Vus avais ditg che Vos sajas in comunicatur cun autas pretensiuns e spetgas da qualitat. Tge vul quai dir?**

Autas pretensiuns, quai pertutga cunzunt la realisaziun da mesiras. Guardai, la comunicaziun è ina chausa fitg cumplitgada. Il comunicatur sto s'approfondar fin il pli pitschen detagl en la materia. En ina situaziun da crisa sco il coronavirus èsi anc pli cumplitgà. Qua datti differentas spetgas dals involvids. Quel che communitescha sto pudair declerar ed interpretar ils fatgs vers l'intern e vers igl extern. La partiziun da medias dal coronavirus grischun lavura fitg savens sut presiun da temp. Latiers vegn che nus essan in chantun cun trais linguas che ston vegnir tractadas egualmain. Per quai emprov jau da vegnir svelto sin il punct d'in problem e da lavurar en direenziun da la finamira. Quai augmenta la qualitat. Ed ina buna qualitat da la comunicaziun è in dretg da quella u da quel che retschaiva ina resposta da mai.

**Dapi in onn e mez essas Vos il pledader dal coronavirus grischun. Tge novas experientschas ha questa lavur da comunicaziun purtà a Vos persunalmain?**

Tar il coronavirus sa tracta quai da far ina comunicaziun che dat confidenza e stgafescha la chapientscha per las mesiras da chantun e Confederaziun tar la populaziun. Quai è tut auter che d'elavurar posiziuns strategicas u da marketing per interpresas commercialas. Communitesgar davart il coronavirus è ina chausa fitg difficila ed ins n'ha savens nagin temp da sa preparar per pudair satisfacer a las pretensiuns da tut ils pertutgads. Er tar las medias sto tut ir svelto. Nus avain fin 200 dumondas da medias per di. Quellas stuain nus elavurar adina tant pli svelto. Ina buna experientscha che jau hai fatg cun quai mandat è da far ina buna comunicaziun en ina situaziun d'urgenza sut presiun da temp ed in medem mument da pudair contribuir indirectamain a la chapientscha per mesiras e decisiuns. En la comunicaziun da crisa succedan blers sbagls en quest senn che quai na vegn betg communitesgà a moda e maniera proactiva.

Agir enstagl da reagir – quai è la suletta buna via per satisfacer ad ina buna infurmaziun ozendi. En la situaziun dal coronavirus è la situaziun actuala cun ils aderents ed ils adversaris da la vaccinaziun e dal certificat fitg

**«Jau sun comunicatur e betg portavusch da mes clients»**

Daniel Camenisch, spezialist da comunicaziun e pledader dal coronavirus grischun

difficila. Gist en quella situaziun èsi cuntraproductiv per exempel da vulair lantschar discussiuns publicas en las medias socialas. En quests cas cun tanta frustraziun tranter partidas ha jau resentì che la comunicaziun vegn al limit.

**Vus tgirais la comunicaziun commerciala, la comunicaziun politica sco pledader da l'Alleanza dal Center dal Grischun, e la comunicaziun da crisa dal coronavirus. Quai è in vast champ.**

Quai è uschia. Jau fatsch dentant comunicaziun e na sun betg il portavusch sin tut quests champs. Il bun comunicatur ha la distanza necessaria. El communitescha e n'è betg part dals acturs involvids. E sco ditg, mes stil e d'infurmar en tuttas situaziuns a moda transparenta.

**A mai dà en egl che Vos duvrais fitg savens il pled comunicaziun proactiva?**

Gea, la comunicaziun proactiva è ina part da mes credo professionel. Jau na fiss betg il Daniel Camenisch, sche jau na fiss betg fidaivel a quest stil da comunicaziun. Jau vi restar vardavel sin tuttas varts e cun tuttas consequenzas e perquai preferesch jau la comunicaziun proactiva e da guardar vinavant.